

文徵內篇下

鄧城縣記第三十八

楊啟東游洞真觀二首

一水藏僊地穿雲拄杖尋層樓掩日影古樹抱龍鱗野鳥
忘機下飛花也自親買山酬宿願瀟灑出風塵

爲愛玄林載酒過神仙元住水雲窩參天古木留煙霧轉
地靈槎犯斗河跨鳳細聞聲韻渺種桃誰謂菜花多游人
每自池臺徧陸海黃塵正息波

徐九巘泥河橋記

環鄧皆河也其南條大河曰沙曰澧咸比舟爲梁與波升
降以利涉者其東北流者曰商橋河乾勒河或累石編木

以通往來故往來人無患也又西北流者爲今泥河距縣
凡五十里許上自洪梁渡來趨入乾勒其分播合同蓋不
可考見云乃潞河流橫南北道凡西向陽翟入郊襄者必
渡茲河東過西華長社者亦必涉此水時遇水溢輒湍悍
奔潰勢不得施舟楫及少殺若可涉顧益沮洳卑溼墊隘
弗可近當時車輿步騎朝過夕至至則濡尾曳輪訖弗克
濟故居民之老聞而相與謀焉曰吾地之水齧斷衢卒使
涉者病莫能通胡可不橋其上以便之乎謀之三歲無成
者而閭慶氏者濱於河者也乃喟然曰杠梁事牧事也而
牧不問咎在水濱曰自吾大父居水濱者已三世顧吾家

頗充裕且多族歲計田可出粟不下千石石直白金兩乃
卽出粟易白金數十兩以倡族乃令族人各出白金兩以
襄厥事故卽無大小咸慨然肯出靡有所顧惜者慶遂卜
吉命工伐山石居月餘石俱輦來積兩岸其嶽然相累而
側者若馬牛之飲於溪其衝然角列而立者若熊羆之登
於山是故橋之架不責取可計而成也乃戒家人子弟曰
供若役勿怠若事怠若事而有罰衆卽忻忻趨事弗敢惰
而工廩調度俱取足閻氏家也豪毛無所須於人亦未嘗
擾爲邑者爲邑者山西趙公錦也趙公嘗義閻氏家閻氏
家累鉅萬族屬且衆好仁樂施卽能慮無遺策舉無難事

暨今年春橋成高若許橫著千丈其下一洞以束水勢用
不數百斤創自正德辛未訖於丙子故輿騎往來而不絕
者無立馬之歎負且販者亦弗病焉所謂一勞而久逸暫
費而永寧者也昔河雒治後人望見之卽思禹有過溱洧
河者不曰溱洧河而曰濟民河二者凡以利於人而已無
他道也今茲橋之成予安知後人不以爲閭氏橋哉劉生
璉請予記諸石俾後之登斯橋者獲識其肇造之歲月云
徐九纓乾勒橋記

乙酉秋乾勒梁成人曰翟子之梁也魏生曰余往如大梁
過乾勒見其梁飲水中歎曰橋梁司牧事也牧弗事其事

咎在水濱水濱之人無義人也耶張生與之俱曰吾聞之
谷泉子之政弗暇也方坐公堂作氣勢鯁鯁然較庶務厭
聽肉鼓吹谷泉子之政弗暇也耶兩生俱自梁梁成曰噫
嘻谷泉子之政暇也不然何以是屹屹也守者曰谷泉子
行矣弗及也此命翟子之所成也兩生復歎曰司牧之命
大矣翟子之惠溥矣嶠山子聞之喜曰余行將上春官也
過乾勒嘗憂民難渡也我今民克濟矣我今其克濟矣曰
君德而虧於三足之鳥月臣道而見蝕於蝦蟆谷泉子非
弗暇也弗及也天辰角見而雨畢雨畢則除道天根見而
水涸水涸則成梁夏令曰九月除道十月成梁其時微曰

收而場功待而畚揭此先王所以廣施德於天下也翟子
其知此歟夫翟子散鞅也無章綬以崇其勢也無廳事以
布其威也無政教以制其慢也無條令以一其位也無左
右給事以行其號也乃能號以召之位以孚之政以制之
卹以振之優以崇之是故弗書也而轉移執事者集矣弗
瞬目也而土木之功協矣弗劓眚也而壺漿者至矣而材
用備矣此所以事易集而不費工易成而不勞君子曰惠
人也若夫浮屠者鼓禱福以誘人固非翟子之所爲

乙酉爲嘉靖四年猶是木橋於此記足徵至姜大成乃
改用石

徐九巖城隍廟修左廡記

正德間流寇充斥武宗以時將軍勦之師次郾乞靈城隍
比戰乃於陣上見之巍冠朱袍者郾神也遂克卽以白金
飾祠宇予先慫亭翁曾記其事嗣是右廊傾圯社人因舊
材易爲宏麗惟左廊頽然北赤王錦氏謁宇下慨其廢如
缺左臂遂幣告神以爲己責錦故明陰陽術輒自卜以協
神謀遂商工計材圖基審制守祠者清淮乃亦咸勤其用
梁棟桷椳瓦甍髹彩俱出之已至若休儒徒庸糗糧工資
四境翕然趨事恐後功始嘉靖丁亥仲春厯三時而畢楹
凡二十與右相稱制則漫遶環抱若拱極之象像則如人

間官府按事之狀至牟福審瞻注肅然慄慄不可欺故
事令至之齋宿卽事祠下明誓戒已丑譙郡楊侯來長治
民謁神盟曰余所爲墨者神厭之誓已循撫下見其斧藻
歎曰曷樹石錦前受命尋具龜螭介陳氏志善謁徐子記
徐子曰余嘗讀漢書見紀侯氏甚怪也紀侯爲鎮江城隍
折虜不支息厲以甯時吏罔敢貪神功以爲己力又見蔣
山神氏苻堅入寇會稽王道子以威儀鼓吹求助廟下故
草木風鶴舉皆效靈於戲異哉今觀我城隍神之贊師滅
寇亦豈可誣耶予嘗聞之閭有袁姓者內相忤必呼神引
詛一日過祠下輒沈迷匍匐陞前受榜箠口代言詰之曰

爾何故忤而乃數稱予幸頃解去信宿方醒視其髀青腫
矣夫孰謂之可厭射也哉烜赫之迹類是者多不能悉故
世之慢神虐民者亦知所警歟茲予非威之以熾其淫惑
而爲禳禱之事乃所以時其爲善以防昏昧之術也抑予
於是得三事焉城隍之胖蠻可錄將軍之精誠可紀王氏
之工役可採先隱亭翁志也因紀其時月云

趙中甫重修縣治碑

正德十一年冬十月辛未趙尹蒞事之明年會僚屬屬吏
胥召耆宿喻曰王中逆徒亂人紀以干天誅熟縣治歷前
尹若范若蘇欲修治弗果爲予偕二三同采賢諸執事爰

舍以居復期月政頗平允民漸鳩集財貨廩餼頗豐頗殖
盡相度以圖營繕衆曰諾尹乃擇左右醇謹者佐司出納
敏且勤者佐司董治命工師繩墨必謹朴斲必勤圻壤欲
完丹牖欲稱乃築周垣起工局改蕭曹祠神面於南闕左
右門便民出入爲室翼門兩傍者凡六楹以休皂輿閭隸
額垣複道堽塞平夷以去障蔽時旣溽寒乃罷役明年春
二月先六曹署署皆三楹楹皆十尺規模堅朴戶牖通明
次及廩藏粟財之所以完以葺麥乃登民往穫九月壬午
禾稼既納土功乃興始作大廳輪奐棟宇節梲棖題悉均
而稱其楹凡四一楹之廣十有三尺深乃倍焉乃塗乃填

雜以黜陟罔飾金碧施及幕廳具體而微落成於十一月
辛酉尹偕同采躋以聽事諸耆宿責記於愚愚惟樂其庇
廕而咏其枝葉忠也稱人之善爲物之則義也鐫勒在庭
諷焉誦焉后之尹鄆者於是感而興焉使吾之子而孫孫
而子曰令尹之嘉樂者趙尹之貽謀也是爲德於無窮者
仁也一紀而三善備焉其可辭尹名錦古鄆世族諸國典
歷世故惠和安靖忠厚老成由國學生始衛京畿繼守是
邑丞則平原楊璲簿則朝城徐鑾典幕則襄陽曹福琛咸
殫心竭力以翼以助是贊是襄尹述職及期登庸可卽來
者宜踴居之者逸作之者勞因尹之獲時葺焉惟務美縣

政弗務美於縣治不然政務而人必瘁尙其念焉毋忽
諸

趙中甫增修鄆學碑

我聖祖高皇帝大統未集羣興國庠旣集亟興郡庠邑庠
八年己卯詔大興社庠嗣聖允迪益隆篤敘今上紹大統
簡修進良申飭人紀值鄆學之敝喬尹遷倡始經理未幾
有司者授以公帑速以簡書嘉靖乙酉九月乃飾垣墉易
櫟桶理榮檐植棟桴砥陂陁正表向曰戟門曰廟門曰殿
門曰堂曰齋曰饌堂曰廩曰廨曰庖弗愆其素念羣賢之
庶諸生之舍太宜改作未及爲丙戌春移率雒陽旣戒待

致於段丞續曰子卒吾事丞曰諾乃增廡楹至八十增舍
至七十六楹曲屋長檐周區劉署以其暇考文獻修廢墜
復鄉賢祠復觀德亭夏五月許侯仁來知縣事丞以告尹
曰善冬十月亟復省牲所丁亥十月作桎杪作泮作梁作
欄楯戊子秋九月作壇己丑春二月許以考績移宰德化
四月段丞擢杞尹將去釋奠於學比奠而三歎禮終司祝
進曰側聞祭不貳事夫子奚歎也曰夫修身以崇教勤事
以備體吾儕小人備體而爲教吾愧其弗崇也是以歎異
教之宇弗督亟成我二三子繼以勤事學以苟完吾鄙夫
化之弗彰是以再歎詩曰凡百君子無不代匱吾懼完弗

美也成弗葺也體廢而教泯也能無三歎乎七月楊尹伯
謙至聞其言謂司訓氏華子玉曰予將有事於學弗美者
儆予美也弗葺者儆予葺也庶其無闕華子繼有請庚寅
春正月尹乃丹楹檜桷刻主樹屏製色帷飾彤几設丹扆
改文昌宮爲名宦祠申命績人坊人梓人曰若爲予時省
而弗懈及代必如一日焉辛卯春三月建敬一亭於東表
尊時制昭聖謨焜燿照臨作人伊邇嗚呼茲役距經始者
凡七稔諸君子其型善而可繼也夫曰者華氏以績遷掌
潞郡教顧子楷左子挺實司郎訓其與諸士徼福於祖宗
之靈忠以事道敬以經德強以執義謙以制禮默以成信

毋政之譏毋禮之議堅忍以益其能潛晦以俟夫時諸君子其亦有賴焉人之好善誰不如我七年之中諸同案百執事其以競勸矣敢識於左

趙中甫郾城縣增葺城隍廟碑

議禮家曰古無城隍祀殆非歟按禮曰血祭曰貍沈曰醢辜凡以祀地祇醢辜之所主者尤多可知者惟八蜡耳城與隍捍大患以衛民乃弗郵表燬若耶春秋曰祈於四墉又曰用馬於四墉周於殯之祀亦慎矣秦漢而僅有可徵匪廢而弗祀亦祀而弗專也逮齊慕容儼在郾州祈城隍廟史載其循風蠶濤三請三獲唐李陽冰有當塗城隍廟

記厥祀在隋唐殆始專賦我聖祖因民之祭命神司監察
專控鎮主以守令掌以吏胥百六十年我國民尤能秉禮
以祀正德辛未巨寇十餘萬殲西平入舞陽攻襄城鄆孤
城如礪惴惴惟神是依十月辛丑王師至鄆左軍督時公
以鄆延精騎千人爲前鋒躬禡於神祠肅若見聞旣遇寇
於鄆之東陂兵未交羣凶大崩左督曰我衆罔滋天助之
顯神鑒之德也免胄拜貺而南明年壬申旣奏功遣裨將
以驛致命於神若曰天子之虎臣源謹以兼金二鎰致餽
於鄆城隍之神用葺靈祠以篤國祐以對神休乃銘於石
藉於有司致享而歸鄆民益信厥徵不爽輪泉布輦材木

金石納米粟彙積者曰相屬錢氏子繼周秦氏紹實
掌而儲之越五載丁丑始爲雷移凡十楹以戒霧露賓享
獻也繼爲夾室於其西以楹記者三十有八慕義者復摹
其制於東本緣業彰勸懲有行弗善者見之凜然懼其及
也善者充然若有獲也嗚呼斯亦幾於治矣嘉靖乙丑復
市民田以北益延袤百六十尺建寢廟六楹設東西十二
楹署曰神廚曰神庫篋衣冠皮籩豆貯幡戟又明年辛卯
郝氏子寬胡氏子楹復振鐸以勸施六月己巳新正廟立
重關闢掖門改周垣高衛闕琢琅爲獸搏土爲闢人規制
備堂陛嚴擬縣治而加設丹朱黼黻金縷陸麗黼堊塹